

Parlamentario Marisol Lopez-Tromp

Cu hopi curashi Minister Otmar Oduber a presenta un ley pa yega na solucionnan pa desperdicio di nos pais

ORANJESTAD (AAN): Durante su disertacion den sala di Parlamento pa trata ley di Serlimar, Lider di Fraccion di POR den Parlamento, Marisol Lopez-Tromp a haci un serie di pregunta y a cuminsa puntrando ken den sala di Parlamento no lo kier pa e situacion na e dump di Parkietenbos cu ta peligroso termina?

Cada un di nos, independiente di ken nos ta y unda nos ta biba ta produci desperdicio, es decir, nos tur ta aporta na e problema aki, consecuentemente hopi biaha e discusion ta bay riba placa, riba ken ta haciendo kico,

,proyectonan etc. pero tur mester tene na cuenta cu sin salud no tin bida, no por traha y no por biba.

E parti aki pa e parlamentario di POR ta sumamente crucial y e situacion cu tin awe den e area aki, unda cu a papia cu e habitantenan entre otro y nan a indica cu e situacion ta sumamente alarmante y cu no por sigui asina.

Tambe Marisol Lopez-Tromp a mostra cu awe desperdicio ta un 'hot topic', antes no tabata asina. Awe desperdicio a bira un negoshi y companianan ta interesa den dje.

Aki na Aruba por mira un desaroyo den añanan

80-90 bini ariba, na unda loke awe ta Serlimar tabata conoci como un lugar di reinigingsdienst cu ta cay bou DOW, despues por a mira un Aruba Bunita N.V. y awendia Serlimar. Rapportnan a indica diferente solucionnan for di e tempo ey. Hopi di nan no a wordo realisa pa sea diferencia di opinion of falta di placa y particularmente falta di curashi pa tuma decision, y esey ta loke tin awendia, un Minister Otmar Oduber cu ta para den sala di Parlamento pa presenta un ley pa purba yega na solucionnan pa nos pais. E curashi aki tambe mester bin di cada



miembro di Parlamento pa fiha un posicion pa elimina e dump di Parkietenbos y cuminsa soluciona e problematica aki pa nos Pais Aruba.

"Mi ta haci un apelacion riba tur miembro di Parlamento pa tene esey bibo den mente y laga e interes aki pa soluciona

pisa como mas pisa den bo toma di decision ora di vota. Cu e ley aki nos ta buscando pa yega na un solucion eficiente, duradero pa e problematica di desperdicio na Aruba".

Continuando cu e preguntanan, Lopez-Tromp a expresa cu ora pasa otro banda di dump riba lama, no ta solamente e holo pero tambe ta wak cu tur e mangroven ta wordo daña, ta wordo afecta y susha cu tur loke

Sigui lesa pag.15



Continuacion pagina.14

ta bin di e dump. E no ta un bunita bista y mucho menos saludabel ni bon pa Aruba ni pa turismo. E mangroven tin un funcion hopi importante pa lama y costa di Aruba. Teniendo esaki na consideracion, e ta puntra minister kico ta wordo haci pa salvaguardia nos mangroven y pa esaki no tuma lugar?

Cual ta e efecto riba nos lama, nos coralnan? Cuanto di e likido toxico ta bay den nos lama y ta afecta nos fauna marino tambe?

Tambe e e ta considera cu e parti di concientisacion ta hopi importante y ta deber pa cada un tene cuenta cu nos tur por aporta como ciudadano riba e parti di desperdicio. Pesey e ta puntra si tin campananan di concientisacion?

Igualmente el a puntra riba e parti di gastonan medico? Cuanto e efecto di dump a afecta nos pueblo directamente por ehempel na gastonan medico, cuanto el a afecta e barionan den cercania? Habitantenan a bay Parlamento y a menciona cu nan tin diferente tipo di problema di salud independiente di nan edad. Den e cuadro aki Marisol kier sa cuanto ta e gastonan di AZV den esaki, gastonan cu nos tur ta pagando y cu por a wordo preveni y por

wordo para?

Marisol Lopez-Tromp ta bisa tambe cu den sala di Parlamento por mira diferente grupo cu kier haya un contesta riba e preocupacionnan cu nan tin. No ta trata solamente e parti financiero, no ta solamente e parti di ken ta haci kico; e ta importante y e ta sigur cu tin rapportnan riba dje y consehonan riba dje, pero "mi kier pidi minister pa splica den su disertacion, con por solucionae situacion cu a surgi entre Serlimar y otro gruponan den comunidad pa trahadornan por keda trankilo. Pa e bay mas den profundidad cu cada un sinta akiden, mama y tata di famia, yiunan di hogar, doño di compania por sinti un trankilidad cu e toma di decision di e ley aki no ta perhudicanan, al contrario, e ta un paso den e bon direccion pa yuda trece un solucion duradero y eficiente na beneficio di Pais Aruba".

Otro pregunta cu el a realisa ta con hopi gobierno a tene cuenta den e ley pa cu solucion pa e habitantenan di e area?

Finalizando Lopez-Tromp a expresa cu ta tarea di Gobierno pa tuma un decision y ehecut'e y miembronan di Parlamento lo vigila esaki na bienestar di pueblo di Aruba.